



Cumün da vaschins Zernez

Protocol

Radunanza da vaschins da marcurdi, als 20 december 2017, a las 20.00, i'l auditori dal Parc Naziunal Svizzer a Zernez

Preschaints: 17 vaschinas e vaschins cun dret da vuschar
S-chüsats: Arno Felix, Mirco Depeder, Fabian Schorta

Tractandas:

- 1. Salüd e bivgnaint**
- 2. Tscherna da duos scrutinaduors**
- 3. Protocol da l'ultima radunanza da vaschins dals 31 mai 2017**
- 4. Vendita da terrain per schlargiar la via dal Pass dal Flüela da Pra d'Less fin sü Punt Pignai**
- 5. Prolungaziun dal contrat da dret da fabrica per l'antenna sü Munt**
- 6. Tschernas:**
 - dal president
 - da 4 commembers da la suprastanza
 - e da 3 commembers da la cumischiun sindicatoria
- 7. Orientaziuns e varia**

1. Salüd

Il president salüda la radunanza e giavüscha la buna saira. El constatescha cha la bannida es ida oura a temp e cha la radunanza es abla da decider. El preschainta la glista da tractandas e lascha approvar quella da la radunanza.

2. Tscherna da duos scrutinaduors

Sco scrutinadur vain tschernü Reto Juon.

3. Protocol da la radunanza dals 31 Mai 2017

Il protocol es stat expost illas assas nairas e sulla pagina d'internet dal cumün. El vain approvà sainza cuntravusch.

4. Vendita da terrain per schlargiar la via dal Pass dal Flüela da Pra d'Less fin sü Punt Pignai

Il president e l'actuar preschaintan la tractanda. I vain muossà ün plan dal proget ed inua chi fa dabsögn da terrain per pudair schlargiar la via. In tuot vuless il chantun cumprar 1100 meters quadrat terrain da 4 parcellas chi toccan, in quel cuntegn, al cumün da vaschins. Per adöver d'ulteriur terrain dürant il temp da fabrica pajess il chantun ultra da quai 3090 francs fit. La suprastanza da vaschins propuona da vender il terrain a favur da la qualità da la via e da la sgürezza e metta quella proposta in discussiun. Duonna Anna Ursina Platzer-Arquint fa la proposta da vender terrain per

vias chi mainan illa fracziun da Susch be culla cundiziun cha'l chantun perseguitescha eir seriusamaing inavant il böt da realisar infra ün temp cuort e survisibel ün sviamaint per la fracziun da Susch. Ella motivescha sia proposta culla ponderaziun cha üna buna via genereschä daplü trafic chi riva lura in cumün e chaschuna qua amo daplü disturbi, co quel chi dà fingià. Ella es eir da l'avis, vias attractivas promouvan be amo daplüs e plü gronds transports da marchanzia, chi rivan lura eir i'l punct da trafic fich neuraligic sulla cruschada ed illas partidas strettas da la fracziun da Susch. Ella nun es pronta da promover propostas da fabrica per vias dadour cumün, intant chi vain laschà d'üna vart ils bsögns da noss abitants. La proposta vain discussa. Il president nun es da l'avis cha'l cumün da vaschins po metter üna tala cundiziun per vender terrain. Our da la radunanza vain però manzunada l'importanza da metter segnals a favur d'ün bun sviamaint per Susch chi serva i'l avegnir a tuots e manzuna cha quist dess esser ün tal segnal. In quel sen nu gajaja cunter ün schlargiamaint da la via dal Pass dal Flüela, ma per ün sviamaint per la fracziun da Susch chi vegna uossa a temp ütil prochatschà illa progettaziun ad ün proget chi dess urgaintamaing avair ün status da prontezza legala. Be cun prochatschar il proget ad ün tal status as po lura üna jada cumanzar a fabrichar cur chi dà lura raps. In quel sen nu stopchan ils vaschins vender terrain e possan metter cundiziuns scha la volontà es quella da demossar üna volontà ferma da s'ingaschar per ün sviamaint per la fracziun da Susch. Il president ha miss in votaziun la proposta da duonna Anna Ursina e quella es gnüda acceptada cun 12 schi e cun 4 cuntravuschs. Il cumün da vaschins es uossa in dovair da comunichar quista novità a Cuoira. I vain discus scha la charta chi va a Cuoira saja o possa gnir fatta publica. I'l sen d'üna transparenza sana, han ils respunsabels da la suprastanza comunichà da na vulair zoppantar da la pubblicità la charta chi va a Cuoira.

5. Prolungaziun dal contrat da dret da fabrica per l'antenna sü Munt

Per l'antenna chi exista uossa bod 30 ons e chi's vezza sü Munt a Zernez, daja ün contrat da dret da fabrica chi d'eira gnü stipulà quella vouta cul chantun per la pulizia chantunala. Uossa davo bod 30 ons vain la respunsabilità per tals contrats surdatta directamaing al comando da la pulizia chantunala e stuvesan perque gnir stipulats da nouv. Implü scroudess il contrat existent inamöd dal 2019, da maniera cha uossa as pudess güsta far ün contrat nouv e güsta prolungar quel per ulteriurs 30 ons. Uschè preschainta il president la dumonda da vart dals respunsabels da la pulizia. La suprastanza da vaschins ha trattà eir quista dumonda per mans da la radunanza e propuona dad aderir a la dumonda. Illa discussiun da la radunanza as discutta da l'otezza cha üna indemnisiun unica per la prolungaziun dal contrat dess esser. Avant 30 ons d'eiran quai stats 1000 francs. Uossa vaiva la suprastanza pensà vi da minimalmaing 3000 francs, però da la counterpart dal contrat chi dess gnir stipulà nu s'ha vuglü confermar da vulair pajar ün tal import. Cun numerus votums insista la radunanza da vulair as tegner vi da quel import minimal ed approva cun quella resalva unanimamaing la dumonda.

6. Tschernas

Il president, Rico Zala, introdüa la tractanda da las tschernas e declera chi saja da far almain trais scrutins in scrit, nempe üna tscherna dal president, üna dals ulteriurs suprastants ed üna per la cumischiu sindicatoria. El orientescha a la radunanza chi nu sajan gnüdas inoltradas ingünas demischiu e cha tuot las personas in uffizi sajan prontas da's laschar eleger per üna ulteriura perioda d'uffizi da trais ons. Tenor ils tschantamaints dal cumün han las tschernas da gnir fattas per scrutin.

Las candidaturas dals uffizianti chi's mettan a disposiziun per üna reelecziun nu vegnan augmentadas per ingüns posts. Ils scrutins chi sun gnüts manats tras illa radunanza han gnü seguant esit:

Prüma, tscherna dal president:

| | |
|-----------------------------|---------|
| vuschs entradas: | 16 |
| vuschs vödas e na valablas: | ingünas |
| vuschs valablas: | 16 |
| majorità absoluta: | 9 |

elet cun 16 vuschs es Rico Zala

Seguonda, tscherna da la suprastanza:

| | |
|-----------------------------|---------|
| vuschs entradas: | 64 |
| vuschs vödas e na valablas: | ingünas |
| vuschs valablas: | 64 |
| cifra electorala: | 9 |

elests sun: Mirko Depeder cun 17 vuschs
 Peider Andri Saluz cun 16 vuschs
 Mattias Bulfoni cun 16 vuschs
 e Hermann Thom cun 15 vuschs

Terza, cumischiun sindicatoria:

| | |
|-----------------------------|---------|
| vuschs entradas: | 48 |
| vuschs vödas e na valablas: | ingünas |
| vuschs valablas: | 48 |
| cifra electorala: | 9 |

elets sun: Christa Pinggera cun 16 vuschs
 Fabian Schorta cun 16 vuschs
 ed Arno Felix cun 16 vuschs

7. Orientaziuns e Varia

Il president da vaschins, Rico Zala, orientescha a la radunanza sur dad oters affars dal cumün da vaschins:

- Natüralisaziuns simplifichadas, da las qualas il cumün da vaschins ha be da tour cogniziun nun haja dat ingünas.
- Dumondas da natüralisaziun entradas in scrit nun haja intant neir dat ingünas, ma duos persunas s'han infuormadas davo las condiziuns per üna natüralisaziun.
- Il president e l'actuar sun stats in settember a Lanquart ad üna scolazion da l'uffizi da cumüns in connex cull'introducziun da las nouvas ledschas da natüralisaziun da la Confederaziun e dal Chantun. Cun quai cha las ledschas superiuras sun gnüdas revaisas e müdadas, es i'l decuors da la prüma mità dal 2018 da far üna revisiun eir da la ledscha da natüralisaziun da nos cumün da vaschins.
- Eir quist inviern vain dovrada la piazza sulla deponia da l'Ova Spin sco lö d'aspet per automobilists chi vöglan viagiar a Livigno.

Ingüns votums suot varia

La radunanza po gnir serrada a las 21.00.

Il president:

Rico Zala

L'actuar:

Hermann Thom